

Nova basa per la scola populara per il nov onn da scola

■ **(cc) La lescha davart las scolas popularas dal chantun Grischun (lescha da scola) entra en vigor per il 1. d'avust 2013, però senza la disposiziun davart il dumber d'emnas da scola. Tar la nova lescha da scola ha la regenza grischuna relaschà in'ordinaziun.** Ils 21 da mars 2012 ha il cussegl grond approvà la revisiun totala da la lescha davart las scolas popularas dal chantun Grischun (lescha da scola). Tenor la lescha importa il temp da scola annual da nov 39 empè da sco fin ussa 38 emnas da scola. La regenza ha concludì da metter en vigor la lescha da scola per il 1. d'avust 2013 cun excepziun da l'alineia respectiv da l'artigel 24. Quest alineia duai entrar en vigor pir cur ch'il nov plan d'instrucziun 21 – elavurà interchantunalmain – vegn deliberà dal chantun Grischun per la realisaziun e cur ch'ils uraris che sa basan sin tal èn sviluppad ed approvads.

Ils uraris actuals cun lur dotaziuns da lecziuns per rom sa chattan en la cumparegliaziun interchantunala – almain per il stgalim primar – sur la media. Pir cur che la dotaziun da lecziuns per scolara e scolar per emna da scola po vegnir reducida po in'extensiu da l'instrucziun an-

nuala da 38 a 39 emnas da scola vegnir acceptada. Quai vegn ad esser il cas il pli baud l'onn da scola 2016/17.

L'ordinaziun da scola concretisescha las disposiziuns legalas

Er per il cumenzament dal proxim onn da scola entra en vigor l'ordinaziun da la regenza tar la lescha da scola (ordinaziun da scola). En questa ordinaziun èn unidas disposiziuns da 18 differentas ordinaziuns vertentas. Per gronda part vegnan surpigliadas en quest connex las regulaziuns vertentas. Las disposiziuns davart las purschidas da tgira d'uffants complementaras a la scola (structuras dal di) n'èn betg vegnidas surpigliadas en la nova ordinaziun da scola. Quellas duain vegnir relaschadas pli tard.

En l'ordinaziun da scola vegnan reglads tranter auter ils suandants puncts: Tenor la nova lescha da scola ha la regenza da nov la cumpetenzza da fixar ils roms obligatorics, ils roms d'elecziun ed ils roms d'elecziun obligatorics. In'exceptiun furman l'instrucziun da linguas e las regulaziuns spezialas concernent il rom religiun che vegnan fixadas sco fin ussa sin il stgalim da la lescha. L'enumeraziun

dals roms obligatorics da la scola primara cuntinuescha cun la regulaziun vertenta e resguarda il rom englais ch'è vegnì introducì da nov cun ina decisiun dal pievel.

Scolas che vulan fixar duas linguas sco linguas da scola per promover las linguas chantunales rumantsch e talian pon far quai sin dumonda cun ina permissiun da la regenza. Ordavant sto vegnir mussà cun in concept che las linguas vegnan resguardadas en ina relaziun equilibrada.

Per meds d'instrucziun che vegnan duvrads probablmain da main che 500 scolaras e scolaras pon vegnir realisadas soluziuns pli favuraivlas.

Il grad d'occupaziun minimal d'ina direcziun da la scola è vegnì reducì dad actualmain 30 a 20 pertschient da plazzas. Uschia pon er scolaras pitschnas installar ina direcziun da la scola resp. survegnir contribuziuns chantunales.

Per sustegnair en scola uffants cun bagens spezials stattan a disposiziun differentas purschidas da scolaziun e da promoziun simplas e pretensiusas. Quellas vegnan numnadas en la nova ordinaziun e lur applicaziun vegn precisada.